

TULAFONO TAU FAAOFI O TAGATA E SUESUEINA MAFUAAGA LILO O MALIU 2016

SAMOA

Faamatalaga e Faamalamalama ai

Sini ma mafuaaga:

O faamoemoega o le Tulafono Tau Faaofi e faapea:

- (a) ia aiaia ai mo se faiga e suesueina ai mafuaaga lilo o maliu faafuasei po o maliu e le o maua mafuaaga, po o maliu e tulai mai i tulaga faapitoa e ese ai, e ala i sailiiliga ma suesuega, e faamautu ai le mafuaaga ma tulaga aliae mai o le maliu;
- (b) ia faatulaga ai galuega tauave, malosiaga ma tiute o tagata e suesueina mafuaaga lilo o maliu; ma
- (c) ia aiaia ai taualumaga e ao ona tauave e tagata e sailiilia ma faia suesuega o mafuaaga lilo o maliu.

VAEGA 1 - FAATOMUAGA

Fuaiupu 1: - ua taua ai e faapea, afai e pasia, o le a taua loa le Tulafono Tau Faaofi o le Tulafono o Tagata e Suesueina Mafuaaga Lilo o Maliu 2016, ma o le a amata faamamaluina i se aso ua filifilia e le Minisita.

Fuaiupu 2: - ua aiaia ai mo le faamatalaina o uiga o upu ua faaaogāina i totonu o le Tulafono Tau Faaofi.

VAEGA 2 - TAGATA E SUESUEINA MAFUAAGA LILO O MALIU

Fuaiupu 3: - ua aiaia ai mo le tofiaina o tagata e suesueina mafuaaga lilo o maliu, e Le Ao o le Malo, i le faia i luga o le fautuaga a le Komisi o Galuega Faa-Faamasinoga.

Fuaiupu 4: - ua aiaia ai e faapea ua agavaa se tagata e ave a o se tagata e suesueina mafuaaga lilo o maliu, pe afai o ia o se loia ua agavaa mo le tofiaina e ave a o se Faamasino o le Faamasinoga Faaitumalo.

- Fuaiupu 5:** - ua faatulaga ai vaitaimi o le tofi mo se tagata e suesueina mafuaaga lilo o maliu.
- Fuaiupu 6:** - ua aiaia ai mo le tautoga o le tofi lea e ao ona faia e se tagata e suesueina mafuaaga lilo o maliu, ma tuuina atu i luma o le Faamasino Sili.
- Fuaiupu 7:** - ua aiaia ai mo totogi ma alauni o se tagata e suesueina mafuaaga lilo o maliu.
- Fuaiupu 8:** - ua aiaia ai mo le faamavaega a se tagata e suesueina mafuaaga lilo o maliu e ala i se faasilasilaga tusitusia e tuuina atu i Le Ao o le Malo, ma faatulaga ai taiala faataatitia ia e mafai ai e Le Ao o le Malo ona aveeseina mai le tofi se tagata e suesueina mafuaaga lilo o maliu, i le faia i luga o le fautuaga a le Komisi o Galuega Faa-Faamasinoga.
- Fuaiupu 9:** - ua aiaia ai mo tuutuuga pe a avanoa se tofi o se tagata e suesueina mafuaaga lilo o maliu.
- Fuaiupu 10:** - ua faatulaga ai galuega tauave a se tagata e suesueina mafuaaga lilo o maliu.
- Fuaiupu 11:** - ua aiaia ai mo tulaga aloaia ma isi malosiaga ia e umia e se tagata e suesueina mafuaaga lilo o maliu, pe a oo ina faatinoina so o se galuega tauave, tiute po o malosiaga i lalo o le Tulafono.

VAEGA 3 - LIPOTIA O MALIU MA TAOTOGA MO LE SUESUEINA O MAFUAAGA LILO O MALIU

Vaevaega 1 - Lipotia o maliu ma le vaavaaiga o tino maliu

- Fuaiupu 12:** - ua aiaia ai mo se tagata o ia lea ua na mauaina se tino maliu po o ua na iloa se maliu ina ia lipoti atu i se leoleo.
- Fuaiupu 13:** - ua aiaia ai le taimi ua i ai i Leoleo ma le tagata e suesueina mafuaaga lilo o maliu, o le puipuigamalu talafeagai o le tino maliu.
- Fuaiupu 14:** - ua aiaia ai mo le aveeseina o se tino maliu mai le puipuigamalu a le tagata e suesueina mafuaaga lilo o maliu, mo faamoemoega o se taotoga mo le mafuaaga o le maliu.

Vaevaega 2 - Aia tatau a le aiga

Fuaiupu 15: - ua faatulaga ai aia tatau a le aiga o le tagata ua maliu.

Vaevaega 3 - Taotoga e suesueina ai mafuaaga lilo o maliu

Fuaiupu 16: - ua aiaia ai mo le malosiaga o se tagata e suesueina mafuaaga lilo o maliu, e faatonu ai se fomai e faia taotoga o tino o maliu, e faatinoina se taotoga mo mafuaaga o le maliu. O le fomai e faia taotoga o se tino o maliu e lē tatau ona faapea o le fomai lea sa togafitia le tagata ma'i i le taimi lava lea a o le i maliu o ia.

Fuaiupu 17: - ua aiaia ai mo se fomai o ia lea sa togafitia le tagata ma'i a o le i maliu o ia, ina ia tuuina atu se lipoti tusia lea e tuuina atu i le fomai e faia taotoga o tino o maliu o faatinoina le taotoga mo mafuaaga o le maliu ma le Komesina o Leoleo (pe afai o le maliu o lea tagata o lo o i lalo o suesuega a leoleo).

Fuaiupu 18: - ua faatulaga ai tagata ua agavaa e auai atu i le taotoga mo le mafuaaga lilo o le maliu.

Fuaiupu 19: ua tuuina atu ai le malosiaga i le Faamasinoga Sili e faatonuina ai se fomai e faia taotoga o tino o maliu e tusa ai ma le fuaiupu 16, ina ia faatino se taotoga o le tino maliu i luga o le talosaga a le Loia Sili.

Vaevaega 4 - Faamatuu atu o le tino maliu ma le taofia o ni vaega o le tino maliu, ma isi tulaga faapena

Fuaiupu 20: - ua aiaia ai mo se tagata e suesueina mafuaaga lilo o maliu ina ia faataga le faamatuu atu o se tino maliu pe afai e le o faasaina mai le faia faapena i lalo o le fuaiupu 21 ma le 22.

Fuaiupu 21: - ua aiaia ai mo tapulaa e uiga i le faamatuu atu o se tino maliu pe afai e le i faatonuina se taotoga e se tagata e suesueina mafuaaga lilo o maliu.

Fuaiupu 22: - ua aiaia ai mo se tagata e suesueina mafuaaga lilo o maliu ina ia lē faatagaina le faamatuu atu o se tino maliu i lalo o le fuaiupu 20, pe afai o manao le fomai

- e faia taotoga o tino o maliu e taofia se vaega o le tino maliu e avea ma vaega faataitai i lalo o le fuaiupu 25(2).
- Fuaiupu 23:** - ua aiaia ai mo le tagata e suesueina mafuaaga lilo o maliu e faatagaina le faamatuu atu o le tino maliu o se tamaitiiti i lalo o le fuaiupu 20, pe afai ua manatu le fomai e faia taotoga o tino o maliu e faapea o le tamaitiiti, sa fanau mai o ia ua maliu e tusa ai o se taotoga mo le mafuaaga o le maliu.
- Fuaiupu 24:** - ua aiaia ai mo se fomai e faia taotoga o tino o maliu e taulimaina pe aveesea se vaega o le tino maliu po o le faaaogāina e avea ma vaega faataitai, po o tulaga uma e lua pe afai e talitonu o ia ua talafeagai ai lea tulaga mo faamoemoega o taotoga mo mafuaaga o le maliu.
- Fuaiupu 25:** - ua aiaia ai mo le taofia o ni vaega o le tino maliu ma vaega faataitai, pe a faamatuu atu se tino maliu e se fomai e faia taotoga o tino o maliu, pe afai o le taofia o ia vaega o le tino maliu ma vaega faataitai ua talafeagai lea mo faamoemoega o se taotoga mo le mafuaaga o le maliu ma, pe afai e le o tetee i ai sui o le aiga po o isi tagata o i latou ia o le a faamatuu atu i ai le tino maliu.

VAEGA 4 - SAILIILIGA MA SUESUEGA O MAFUAAGA LILO O MALIU

Vaevaega 1 - Sailiiliga o mafuaaga lilo o le maliu

- Fuaiupu 26:** - ua faatulaga atu ai le faamoemoe o se sailiiliga o mafuaaga lilo o se maliu, lea e faamautu ai le mafuaaga ma tulaga ua aliae mai ai se maliu.
- Fuaiupu 27:** - ua aiaia ai mo le tagata e suesueina mafuaaga lilo o maliu ina ia aua le faaalua ni manatu e aafia ai le tagata ua maliu po o e uiga i so o se isi lava tagata e aunoa ma le faia o laasaga talafeagai e logoina ai sui o le aiga po o le isi lea tagata e faatatau i le manatu ua fuafua e faaalua.
- Fuaiupu 28:** - ua tuuina atu ai le malosiaga i se tagata e suesueina mafuaaga lilo o maliu e amata ai ma faia sailiiliga o mafuaaga lilo o le maliu.

- Fuaiupu 29:** - ua aiaia ai mo mataupu e lē mafai ai e se tagata e suesueina mafuaaga lilo o maliu ona faia se sailiiliga o le mafuaaga lilo o le maliu.
- Fuaiupu 30:** - ua aiaia ai mo le taualumaga e ao ona faatino e le tagata e suesueina mafuaaga lilo o maliu o ia lea ua logoina e faapea, ua molia se tagata mo le maliu o se isi tagata.
- Fuaiupu 31:** - ua aiaia ai mo le tolopoina o le amataina o sailiiliga o mafuaaga o le maliu pe afai o faatino nisi suesuega i lalo o so o se isi tulafono e aafia ai le maliu.
- Fuaiupu 32:** - ua tuuina atu ai le malosiaga i se tagata e suesueina mafuaaga lilo o maliu ina ia aua nei faia pe amataina se sailiiliga o le mafuaaga lilo o se maliu pe afai ua faamautuina le mafuaaga po o tulaga aliae mai o se maliu i lalo o se taualumaga tau solitulafono po o se suesuega.
- Fuaiupu 33:** - ua faasaina ai se tagata mai le faailoa faalauaitete atu o auiliiliga o se maliu e mafua mai i se mea na faia lava e ia (mataupu tau le pule i le ola) e aunoa ma le faamaoniga muamua a se tagata e suesueina mafuaaga lilo o maliu.
- Fuaiupu 34:** - ua tuuina atu ai malosiaga i se tagata e suesueina mafuaaga lilo o maliu e faasaina ai le faailoa faalauaitete atu o faamatalaga molimau na maua i so o se vaega o taualumaga tau suesuega.
- Fuaiupu 35:** - ua faatagaina ai se tagata e talosaga i le Faamasinoga Sili mo se iloiloga o le faaiuga a le tagata e suesueina mafuaaga lilo o maliu lea e lē faasalalauina faalauaitete ai so o se auiliiliga po o se faamatalaga molimau o se sailiiliga.
- Fuaiupu 36:** - ua aiaia ai le tiute tauave o se tagata e suesueina mafuaaga lilo o maliu e taliaina ai faamatalaga molimau.
- Fuaiupu 37:** - ua tuuina atu ai le malosiaga i se tagata e suesueina mafuaaga lilo o maliu e faia ai suesuega i luga o pepa ma sailiiliga a faamasino.
- Fuaiupu 38:** - ua aiaia ai mo tulaga aloaia ma puipuigamalu mo tagata molimau ma loaia.

- Fuaiupu 39:** - ua tuuina atu ai le malosiaga i se tagata e suesueina mafuaaga lilo o maliu e faataga ai so o se faamatalaga molimau e tusa lava pe lē taliaina lea faamatalaga molimau.

Vaevaega 2 - Faatinoga o suesuega

- Fuaiupu 40:** - ua aiaia ai mo mataupu ia e noatia ai se tagata e suesueina mafuaaga lilo o maliu e faia se suesuega o mafuaaga o le maliu, pe afai o le maliu e faasino i se tagata o aloaia le puipuigamalu e pei o se pagota.
- Fuaiupu 41:** - ua aiaia ai mo se tagata e suesueina mafuaaga lilo o maliu, o ia lea ua filifili e fai se suesuega, ina ia atofaina se aso, taimi ma le nofoaga mo le suesuega.
- Fuaiupu 42:** - ua aiaia ai mo suesuega ina ia faia i luma o se tagata e suesueina mafuaaga lilo o maliu na o ia lava.
- Fuaiupu 43:** - ua tuuina atu ai le malosiaga i se tagata e suesueina mafuaaga lilo o maliu e tofia ni tagata faufautua ina ia auai i le suesuega ma fesoasoani atu ia te ia.
- Fuaiupu 44:** - ua tuuina atu ai le malosiaga i se tagata e suesueina mafuaaga lilo o maliu e faia ai se suesuega e tasi pe afai ua ia faia le lua (2) po o le sili atu o suesuega eseese o mafuaaga lilo o maliu e faasino i le lua (2) po o le sili atu o maliu e tulai mai i lea lava faalavelave na tupu po o le faasologa o ni faalavelave tutupu.
- Fuaiupu 45:** - ua aiaia ai e faapea e ao ona faia se suesuega i se nofoaga lautele lea e avanoa i ai tagata lautele.
- Fuaiupu 46:** - ua tuuina atu ai le malosiaga i se tagata e suesueina mafuaaga lilo o maliu e teena ai so o se tagata mai le suesuega atoa po o sona vaega.
- Fuaiupu 47:** - ua tuuina atu ai le malosiaga i se tagata e suesueina mafuaaga lilo o maliu e faatonu ai se tagata molimau ina ia i ai pea i fafo atu o le nofoaga lea e faatino ai le suesuega seia oo ina manaomia o ia e tuuina atu lana faamatalaga molimau.
- Fuaiupu 48:** - ua aiaia ai mo le faiga lea e mafai ona tuuina atu ai faamatalaga molimau e se tagata i se suesuega.

- Fuaiupu 49:** - ua aiaia ai mo tagata o i latou ia e mafai ona auai i se suesuega.
- Fuaiupu 50:** - ua faatagaina ai se faamatalaga tusitusia e ao ona tuuina atu e se tagata molimau i se suesuega.
- Fuaiupu 51:** - ua aiaia ai mo se tagata e suesueina mafuaaga lilo o maliu na te faatagaina (e ala i se faasilasilaga tusitusia) se isi tagata e suesueina mafuaaga lilo o maliu po o se loia (o ia lea e i ai malosiaga tutusa e uiga i le faaaogāina o faamatalaga molimau e pei o le tagata o lo o ia suesueina mafuaaga lilo o le maliu o lo o faia le suesuega) e faaaogāina faamatalaga molimau.

Vaevaega 3 - Faamaeaina o le sailiiliga

- Fuaiupu 52:** - ua taua ai e faapea e lē tatau ona tuuina atu se tusi faamaonia o sailiiliga lē tumau e se tagata e suesueina mafuaaga lilo o maliu, po o e lē tatau ona faamaeaina se suesuega seia vagana ua maea ona silasila i le tino maliu i Samoa po o ua leiloa.
- Fuaiupu 53:** - ua tuuina atu ai le malosiaga i se tagata e suesueina mafuaaga lilo o maliu e tuuina atu se tusi faamaonia o sailiiliga lē tumau e uiga i le mea moni ma le mafuaaga o le maliu.
- Fuaiupu 54:** - ua tuuina atu ai le malosiaga i se tagata e suesueina mafuaaga lilo o maliu e tuuina atu ai se tusi faamaonia mausali o sailiiliga.

Vaevaega 4 - Sailiiliga po o sailiiliga faapoopo ua poloaia e le Faamasinoga Sili

- Fuaiupu 55:** - ua tuuina atu ai le malosiaga i le Faamasinoga e faia ai se suesuega o mafuaaga lilo o se maliu pe afai ua faamalieina le Faamasinoga e faapea e manaomia se sailiiliga o mafuaaga lilo o le maliu, ma pe afai ua lē faia po o ua teena e le tagata e suesueina le mafuaaga lilo o maliu le faia o se sailiiliga.

- Fuaiupu 56:** - ua tuuina atu ai le malosiaga i le Faamasinoga e faia ai se suesuega o mafuaaga lilo o le maliu, pe afai ua toe maua mai ni mea moni fou ua alagatau ai ona manaomia le faia o se sailiiliga o mafuaaga lilo o le maliu.
- Fuaiupu 57:** - ua tuuina atu ai le malosiaga i le Faamasinoga e poloaia ai se isi sailiiliga ona o ni mea moni fou, tau faasese, teena o faamatalaga molimau po o se tulaga faaletonu o taualumaga.
- Fuaiupu 58:** - ua aiaia ai mo malosiaga e faatino i lalo o le fuaiupu 55 e oo atu i le 57, ia e faatoa faatinoina i luga o se talosaga e faia e le Loia Sili.
- Fuaiupu 59:** - ua taua ai e faapea o faiga ma le faaooina atu o poloaiga i lalo o fuaiupu 55 e oo i le 57, e ao ona faia i se faiga tusitusia ma faamaoti ai le tagata e suesueina mafuaaga lilo o le maliu, o ia lea e ao ona ia faia ma faatino le sailiiliga o mafuaaga lilo o le maliu.
- Fuaiupu 60:** - ua aiaia ai e faapea, e suia i sailiiliga o se suesuega o mafuaaga lilo o se maliu e tusa ai ma poloaiga i lalo o fuaiupu 55 e oo i le 57 so o se sailiiliga na faia muamua.

VAEGA 5 - O ISI TIUTE TAUAVE MA MALOSIAGA

- Fuaiupu 61:** - ua aiaia ai mo Leoleo ina ia fesoasoani atu i tagata e suesueina mafuaaga lilo o le maliu.
- Fuaiupu 62:** - ua aiaia ai mo le Matagaluega ina ia tuuina atu le lagolago tau pulega i tagata e suesueina mafuaaga lilo o le maliu, i le faatinoina o o latou galuega tauave, tiute ma malosiaga.
- Fuaiupu 63:** - ua tuuina atu ai le malosiaga i se tagata e suesueina mafuaaga lilo o le maliu e tapa ai se isi tagata e faatinoina so o se suesuega, a o le i filifili pe faia se sailiiliga po o le faamaea o se sailiiliga.
- Fuaiupu 64:** - ua aiaia ai mo se tagata e suesueina mafuaaga lilo o maliu ina ia faasee atu se maliu ua taua i le tasi (1) po o le sili atu o pulega mo suesuega.

- Fuaiupu 65:** - ua tuuina atu ai le malosiaga i se tagata e suesueina mafuaaga lilo o le maliu e tapa ai se tagata ina ia tuuina atu faamatalaga po o pepa aloaia mo faamoemoega o se saililiga.
- Fuaiupu 66:** - ua aiaia ai mafuaaga o le teena mo se tagata o ia lea na faaoo atu i ai se faasilasilaga i lalo o le fuaiupu 65 ina ia tuuina atu faamatalaga po o pepa aloaia.
- Fuaiupu 67:** - ua tuuina atu ai le malosiaga i se Faamasino o le Faamasinoga Faaitumalo ina ia faatonuina le faia o se suesuega mo faamoemoega o le mauaina mai o faamatalaga.
- Fuaiupu 68:** - ua faatagaina ai se leoleo e faatino le tusi faapoloaiga e faia ai se suesuega ua tuuina atu i lalo o le fuaiupu 67.
- Fuaiupu 69:** - ua aiaia ai mo tiute tauave ia e ao ona faatino e se leoleo pe a oo ina faataunuuna se tusi faapoloaiga i lalo o le fuaiupu 67.
- Fuaiupu 70:** - ua aiaia ai mo mafuaaga mo le taofia o se mea o sailia e ala i se tusi faapoloaiga i lalo o le fuaiupu 67.
- Fuaiupu 71:** - ua aiaia ai mo se tagata o talosaga i le Faamasinoga Sili mo se iloiloga o le faalēaogāina o se tagi i lalo o le fuaiupu 66(2).
- Fuaiupu 72:** - ua faatapulaaina ai le faaaogāina o faamatalaga e se tagata o tali atu ai i se faasilasilaga i lalo o le fuaiupu 65, po o le maua mai e ala i le faataunuuna o se tusi faapoloaiga i lalo o le fuaiupu 67.
- Fuaiupu 73:** - ua tuuina atu ai le malosiaga i se Faamasino o le Faamasinoga Faaitumalo e tuuina atu se tusi faapoloaiga e faatagaina ai se leoleo e aveesea mai se tino maliu mai se nofoaga maoti.
- Fuaiupu 74:** - ua aiaia ai mo le faaopoopoina o malosiaga i lalo o se tusi faapoloaiga ua tuuina atu i lalo o le fuaiupu 73.
- Fuaiupu 75:** - ua aiaia ai mo se leoleo o lo o ia faataunuuna se tusi faapoloaiga i lalo o le fuaiupu 73 ina ia tuuina atu le tusi faapoloaiga.
- Fuaiupu 76:** - ua aiaia ai mo le malosiaga e faoa faamalosi ai se mea pe afai o lo o tausisia e se leoleo se faatonuga po o se tusi faapoloaiga e aveeseina ai se tino maliu.

VAEGA 6 - AIAIGA ESEESE

- Fuaiupu 77:** - ua faia ai soligatulafono.
- Fuaiupu 78:** - ua taua ai e faapea e mafai ona faia suesuega i Aso Sa pe afai ua manatu le tagata e suesueina mafuaaga lilo o le maliu ua talafeagai le faia o le suesuega i lea aso.
- Fuaiupu 79:** - ua aiaia ai mo totogifuapauina ma alauni e mafai ona tauia ai e se tagata e suesueina mafuaaga lilo o maliu i latou o tuuina atu faamatalaga molimau i se suesuega.
- Fuaiupu 80:** - ua aiaia ai mo tuusaunoaga mai noataga tau le tagata lava ia.
- Fuaiupu 81:** - ua tuuina atu ai le malosiaga i le Faamasino Sili e tuuina atu ai faamatalaga tau faatinoga.
- Fuaiupu 82:** - ua aiaia ai mo se tagata e suesueina mafuaaga lilo o le maliu ina ia faia se faasalaga tau tupe ua faatatauina pe afai ua faapea ona talosagaina e le Komesina o Leoleo, o le Ofisa Sili o Tinei Mu po o le Ofisa Sili o Pulega.
- Fuaiupu 83:** - ua aiaia ai mo sailiiliga o mafuaaga lilo o maliu o sui o vaega auasiasi mai ia e lē tatau ona faia pe afai e le i amataina e se tagata e suesueina mafuaaga lilo o maliu se sailiiliga.
- Fuaiupu 84:** - ua tagofia ai sailiiliga o mafuaaga lilo o maliu po o se suesuega e faatino i se tagata o ia lea e i ai tulaga aloaia faava o malo.
- Fuaiupu 85:** - ua tuuina atu ai le malosiaga i le Faamasino Sili e faamaonia ai pepa faatumu.
- Fuaiupu 86:** - ua aiaia ai mo le tagata e suesueina mafuaaga lilo o maliu ina ia aua nei faailoaina atu i so o se isi lava vaega auai e i ai aia, so o se faamatalaga ua tuuina atu e le Loia Sili po o Leoleo i se agaga faauo (uo a le faamasinoga) e fesoasoani ai i so o se sailiiliga po o se suesuega.
- Fuaiupu 87:** - ua tuuina atu ai le malosiaga i Le Ao o le Malo i le faia i luga o le fautuaga a le Kapeneta, e faia ai tulafono faatonutonu.

Fuaiupu 88: - ua soloia le Tulafono o Alii e Suesueina Mafuaaga Lilo o Maliu 1959 ma aiaia ai mo aiaiga tau soloaiga.

.....

(Hon FAAOLESA Katopau T. Ainuu)

MINISITA O FAAMASINOGA MA

PULEGA TAU FAAMASINOGA